

الأنبياء الصغار

سفر يونا

أفلا أشفق؟

سفر رائع في تفهيمنا قد إيه ربنا لا يشاء أن يهلك الخاطي بل أن يرجع و يحيا ... الله اللي بتوبة حقيقية يغفر خطايا سنين كثير و يرحم و يصفح ... و يواجه كل واحد فينا: هل الصفة دي في ربنا كويسة بالنسبة لك ... لو معناها رحمة لعدوك؟

× **طبعاً الملخص ده لا يغني أبدأ عن الوعظات و التأملات العميقة في كلام الكتاب المقدس ... دي محاولة بسيطة لتقديم ملخص بسيط للأسفار** 🔔

؟ **ليه ندرس عهد قديم؟**

"فتشوا الكتب لأنكم تظنون أن لكم فيها حياة أبدية. وهي التي تشهد لي"

وصية واضحة من ربنا لدراسة العهد القديم (تلتين الكتاب المقدس) ...

1. مانقدرش نستوعب العهد الجديد صح غير من خلال نبوات و أحداث العهد القديم
2. ربنا هو هو أمس و اليوم ... و كذلك الإنسان ... العهد القديم غني جداً في شرح معاملات ربنا مع الإنسان بطريقة تخلينا نفهم ربنا
3. الكلام ده اتكتب عشاننا (الوعود و الوصايا لا تتغير) ... ربنا كمل لنا (لم آت لأنقض بل لأكمل)

✎ **عن الكاتب**

👤 **معنى الاسم: حمامة ...** (على اعتبار إن الناس الأشرار محتاجين الروح القدس اللي أحد رموزه الحمامة، حتى يدعوهم للتوبة) ... التقليد اليهودي بيقول إنه ابن أرملة صرقة صيدا اللي أقامه إيليا من الموت

📅 **فترة النبوة: من أنبياء قبل السبي ... كانت نبوته في عهد الملك يربعام الثاني (في مملكة إسرائيل)**

🏆 **أهم إنجازاته:**

- يونا من أكثر الشخصيات الغريبة ... ناس كثير بتحتار: إزاي رجل الله يبقى متغاض إن ربنا عايز الناس تتوب و عايز يرحمهم؟
- الحقيقة إن يونا كان نفسه الناس دي تهلك لأنهم كانوا بيشكّلوا خطر حقيقي على إسرائيل ... و فعلاً أشور (اللي عاصمتها نينوى) سبّت مملكة إسرائيل و كان حكمها دموي جداً
- يونا عنده شوية إنجازات:
 1. إنه مخافش يروح نينوى رغم إنها مدينة ناسها أشرار جداً
 2. إنه بشر البحارة برّنا (حتى لو بدون قصد) و مخافش يقول لهم إن البحر هاج بسببه
 3. إنه صلى صلاة رائعة في الإصباح الثاني ... غلب فيها الرجاء اليأس
 4. أصبح رمز للسيد المسيح اللي غلب الموت و بشرنا بالخلاص (بشرط التوبة)
- بدّل ما ندين يونا، المفروض يونا يعطي كل واحد فينا رجا إن ربنا ممكن يشتغل بيه على الرغم من عيوبه ... ربنا كان ممكن بمنتهى البساطة يبعث أي حد ثاني قطيع بدل يونا ... يونا ماعملش مجهود كبير يعني عشان نينوى تتوب ... لكن ربنا لا يترك أولاده أبداً ... كان عايز يشتغل بيونا و يعلمه قد إيه ربنا رحمته شاملة الكل ... و إنه لا يشاء أن يهلك حتى أشرّ الخطاة بل أن يُقبل إلى التوبة





ظروف الكتابة: ?

- الحقيقة إن يونا كان نفسه نينوى تهلك لأنهم كانوا يشكّلوا خطر حقيقي على إسرائيل ... و فعلاً آشور (التي عاصمتها نينوى) سبّت مملكة إسرائيل و كان حكمها دموي جداً
- + كمان إن في الثقافة اليهودية، ربنا ده إلههم هم فقط ... سر تميّزهم كشعب عن باقي الشعوب ... ليه يكرز بيه للأمميين؟
- طبعاً ربنا عادل ... لقّا نينوى شرها و فسادها بقى بلا رجوع ولا توبة، أرسل ناحوم النبي اللي تنبأ عن هلاك آشور على يد بابل

السفر موجّه لمين؟

- سفر يونا من الأسفار الغريبة في أسفار الأنبياء، لأنه مش بيتكوّن من نبوّات ليونا، بل بيحكي قصة يونا
- القصة دي و رسالتها موجّهة للبشرية كلها على مدى العصور

هدف السفر: ✓

- السفر ده رغم بساطته و قصّره عميق جداً في معانيه ... فيه دروس كتير جداً أهمها توضيح قد إيه ربنا بيحب الخطاة و يدور على خلاصهم
- مافيش حدّ خلاصه مستحيل ... مدينة كاملة شريرة ثابت بمناداة سريعة من نبي غير مقتنع برسالة قصيرة و مافيهش أي رجاء ... مافيش حاجة صعبة على ربنا
- سفر المتناقضات الكثير اللي بيواجه كل واحد فينا: هل انت موافق إن ربنا يرحم و يسامح أعدائك؟ و بّدل ما نفضل نتكلّم عن يونا و إنه إزاي رجل الله يعمل كده، يا ريت السفر ده يكون مراية كل واحد فينا يشوف فيها نفسه: هل أنا (و أنا في العهد الجديد، عهد النعمة) قادر أحب عدوّي؟
- بيخّل كل واحد يسأل نفسه: هل أنا باهرب من ربنا؟ فيه حاجة في حياتي مش عايز أسمع كلامه فيها لسة؟ الحقيقة رغم إن الإجابة في أغلب الأوقات بتبقى: نعم ... لكن ربنا بيوزّنا إنه مصمّم يستخدمنا برضه ... بحبه العجيب بيصبر علينا لحدّ ما نفهم ... لو مش بالكلام يبقى بالعاصفة .. أو البحر ... أو ناس مؤمنين بطريقة غير متوقّعة .. أو الحوت .. أو الغفران .. أو اليقطينة و التعزية ... أو التجربة ... ربنا لا ييأس أبداً و مش بس يونا دعى نينوى بالتوبة، ده كمان في السكة آمن البحارة في المركب ... يعني محاولة يونا للهرب جائت بالخير للبحارة اللي عرفوا ربنا
- التوبة الفردية (يونا في جوف الحوت) و الجماعية (مدينة نينوى) هي شرط للخلاص

مفتاح فهم السفر: ✍

- السفر بيواجهنا بتصرّفات عكس كل توقّعاتنا من الناس: النبي بيعصى أمر ربنا ... البشارة الوثنيين بيؤمنوا و يتوبوا ... نينوى المملكة الشريرة جداً و القاسية تجلس في المسوح و الرماد في صوم و توبة بنحتفل بيها كل سنة
- آشور كانت مملكة دموية و شريرة و كانت بتتمثّل خطورة كبيرة على مملكة إسرائيل
- طبعاً ده مش موضوعنا، لكن علمياً مش مستحيل الإنسان يفضل حي في أماكن معيّنة من جوف الحوت ... و حُصّلت لناس تانيين





يونا و البحارة

إصحاح #1

دعوة ربنا ليونان .. و رفض يونا و هروبه في سفينة ... و العاصفة و إيمان البحارة ... و بلع الحوت ليونان

تفاصيل أكثر



توبة يونا و صلاته

إصحاح #2

يونا في حوف الحوت يصلي صلاة رائعة مليئة بالرجاء

تفاصيل أكثر



يونا في نينوى

إصحاح #3

كرازة يونا في نينوى، و توبة أهلها و رحمة الله لهم

تفاصيل أكثر



عتاب يونا لله

إصحاح #4

الله يشرح ليونا قتل لمحبيه لكل البشر من خلال قصة اليقطينة

تفاصيل أكثر

صور السفر

1: يونا و البحارة




- السفر يبدأ إن ربنا يقول ليونان يروح ينادي نينوى (عاصمة آشور) بالتوبة لأنها وصلت لمرحلة صعبة جداً من الشر (آية 2)
- يونان هرب من ربنا ... بدل ما يروح شرق، راح غرب (في مركب على ترشيش) (آية 3)
- و نام يونان في السفينة نوم ثقيل (آية 5)
- ربنا أرسل عاصفة قوية جداً عشان يونان يفوق (آية 4)
- و العاصفة كانت قوية و غير متوقعة لدرجة إن البحارة اللي عندهم خبرة حسوا إن فيه قوة غريبة في الموضوع ... و رموا الأمتعة و صرخوا لآلهتهم و صخوا يونان (آية 5)
- سألو يونان (الشخص الغريب اللي معاهم) فاعترف إنه بيعبد إله البحر و البحر (آية 9)
- و لما سألو: طيب نعمل إيه؟ كان ردّ يونان: إرموني من المركب! (آية 12)
- حاولوا في الأوّل يشوفوا أي حل ثاني لكن ماقدروش ... فاضطروا يرموه و هم يقولوا لربنا إنه لا يحسب دم يونان عليهم (لأنه الطبيعي إنه يموت اللي يترمي في العاصفة دي) (آية 14)
- و رموا يونان في البحر اللي على طول هدي ... فأمنوا بربنا (آية 16)
- و بينتهي الإصحاح برحمة عظيمة من ربنا اللي جهّز حوت عشان يبتلع يونان كي لا يموت (آية 17)
- و هكذا بقي يونان في جوف الحوت 3 أيام

نتعلّم إيه؟

كل الأشياء تعمل للخير ... عناد يونان سبب في معرفة البحارة لربنا

— 🙏 يا رب أنا واثق إن انت ضابط الكل، و كل أعمالك خير ... حتى لو أنا بوّظت الدنيا، انت هاتشتغل بي للخير برضه

2: توبة يونان و صلاته



- في جوف الحوت ... تحوّل الموت لحياة (طبعاً كمثال المسيح في القبر)
- يونان و هو في جوف الحوت صلّى واحدة من أروع الصلوات اللي في الكتاب المقدّس (بنقرأها في نبوات سبت النور)
- الصلاة دي بدأت شكر لربنا إنه لم يتركه (آية 2)
- و انتهت بوعده إنه هايطيع ربنا (آية 9)
- عندها، ربنا أمر الحوت فقذف يونان تاني إلى الشاطئ (آية 10)

نتعلّم إيه؟

يونا ن رغم إنه عارف إنه عامل مصيبة بعصيانه لربنا، كان عنده ثقة كاملة في محبة ربنا و رحمته عليه

— 🙏 يا رب إديني حتى لو حاسس إني في جوف الهاوية، أصرخ إليك واثقاً أنّك تسمعني ... و أنّي أعود أنظر هيكلك

3: يونان في نينوى




- ربنا عاد ليونان الأمر ثاني كما هو: اذهب إلى نينوى و نادي عليها ... فرصة جديدة تماماً، كأن التوبة مَسَحَتْ كل القديم ... يونا سمع الكلام المرّة دي (آية 2)
- نينوى كانت مدينة كبيرة جداً و محتاجة أيام عشان يونا ينادي فيها كلها (آية 3)
- يونا كان كلامه كأنه مش عايزهم يتوبوا بل عايزهم يهلكوا! لم يقل لهم:
 1. إيه هي خطيئتهم؟
 2. مين اللي هايقلب المدينة؟
 3. يعملوا إيه عشان يخلصوا؟
- الغريب جداً إن المدينة كلها (من الملك للأطفال في الشعب كله، و حتى البهائم) صاموا صوم قوي جداً في مسوح و رماد ... يمكن عرفوا إنه خارج من جوف الحوت (كأنه قائم من الأموات) (آية 5 ل 9)
- طبعاً قدام التوبة العظيمة دي، رحمهم الله و غفر لهم و رفع غضبه عنهم (زي ما بنقول في القسمة) (آية 10)
- و هنا المفارقة: يونا قال إن المدينة سوف (تنقلب) ... و الكلمة قد تعني الهلاك و الدمار (زي سدوم و عمورة) و قد تعني التغيير الكلي (و ده اللي حصل فعلاً! نينوى انقلبت 180 درجة من شر و خطية و فساد لصوم و صلاة و مسوح) ... يعني كلام يونا تحقق فعلاً

نتعلم إيه؟

ما فيش حاجة اسمها إن حد مستحيل يخلص أو إن مافيهوش أمل ... طول ما الإنسان حي، ربنا مستنّيه يتوب و بيدور عليه بكل الطرق حتى لا يهلك

— 🙏 يا رب خلّيني عندي هذا الرجاء في نفسي (إن التوبة الحقيقية دائماً مقبولة مهما كنت أنا بعيد عنك) ... و أنقل الرجاء ده لكل أولادك البعاد عنك

4: عتاب يونا لله



- **يونا في الإصحاح ده بدأ بعتاب لربنا و قال له: عشان كده أنا هربت في الأول ... مش عشان خايف من أهل نينوى، بل عشان عارف إن ربنا ممكن يرحمهم (آية 2)**
- ده كان وصف ربنا لنفسه زي ما قال لموسى (في سفر الخروج 34 : 6): إنه طويل الروح و كثير الرحمة ... يونا بدل ما يفرح بالصفات دي، بيعاتب ربنا عليها
- و قال له: يا رب خدني خلاص مش عايز أعيش!
- **ربنا إله طيب جداً ... و عشان صفاته (اللي يونا كان متضايق منها) رحم يونا ... بل سأله: انت شايف إن عندك حق في غيظك؟ و لم نسمع حتى رد يونا (آية 4)**
- يونا خرج و عمل مظلة لنفسه خارج المدينة و قعد يراقب المدينة ... يمكن يرجعوا في توبتهم (آية 5)
- الجو كان حارّ، فربنا أعدّ يقطينة (شجرة لبلا) عشان تظلّ على يونا ... اللي فرح بيها جداً (آية 6)
- بعد كده ربنا أرسل دودة ضربت اليقطينة ... فيونا تضايق جداً (آية 7 و 8)
- و ثاني طلب يونا الموت لنفسه ... و ثاني ربنا سأله: هل معاك حق في غيظك ده؟ (آية 8 و 9)
- يونا في آخر كلماته في السفر بيردّ على ربنا و يقول له: طبعاً معايا حق (آية 10)
- **ربنا في آخر كلماته في السفر فهمّ يونا ... إن قصة اليقطينة مثال صغير لقد إيه ربنا بيحزن على هلاك الخطاة ... و إنه نفسه يرجعوا و يتوبوا و يخلصوا (آية 11)**

نتعلّم إيه؟

ربنا حنين جداً علينا ... يُشفق علينا لَمّا نكون في غاية الحماقة ... عايز يفهمنا قصده و فكره بمنتهى الصبر و الحب، زي الأب مع أولاده

— يا رب أشكرك على صبرك و محبتك معي أنا اللي دايماً بالتعبك و مش فاهمك ... يا رب إديني استنارة روحك القدوس و محبة قلبك العظيم

أهم الآيات



آيات تلخّص السفر

قُم إذهب إلى نينوى المدينة العظيمة و نادِ عليها لأنه قد صعد شرّهم أمامي

— يونان 1 : 2

ربنا لا يشاء موت الخاطي مهما كان وحيث بدأ، بل أن يتوب فيحيا

و أما الرب فأعدّ حوتاً عظيماً ليبتلع يونان. فكان يونان في جوف الحوت ثلاثة أيام و ثلاث ليالٍ

— يونان 1 : 17

ربنا أنقذ يونان طبعاً من العاصفة، لأنها ليست لهلاكه
و أخذ خلوة إجبارية في جوف الحوت عشان مايقدرش يهرب ... إلا إلى الله بالصلاة
و بقى مثال للمسيح اللي مكث في القبر 3 أيام و قام

فقلت: قد طردت من أمام عينيك. ولكنني أعود أنظر إلى هيكل قدسك

— يونان 2 : 4

الْيَأْسُ يَتَحَوَّلُ لِرَجَاءٍ ... تفاصيل أكثر في التأمّل ده

و أمر الرب الحوت فقذف يونان إلى البَر

— يونان 2 : 10

خلاص طالما يونان تاب و رجع و صلّى، يبقى الحوت عَمَل اللي عليه، و جه وقت الشغل تاني

قُم إذهب إلى نينوى المدينة العظيمة و نادِ لها المناداة التي أنا مكلمك بها

— يونان 3 : 2

التوبة = مسح للماضي اللي كان فيه رفض ... ولا كأن فيه حاجة حصلت، و كأن السفر ببداً تاني
ربنا رائع في إنه بيستخدمنا لمجد اسمه ... كل واحد ليه رسالة و لازم يعملها

فلما رأى الله أعمالهم أنهم رجعوا عن طريقهم الرديئة ندم الله على الشر الذي تكلم أن يصنعه بهم فلم يصنعه

— يونان 3 : 10

توبة حقيقية مع صوم و صلاة = رحمة ربنا

فقال الرب: هل اغتظت بالصواب؟

— يونا 4 : 4

ربنا طيب جداً معنا زي الأب اللي بيراضي ابنه العنيد المخطئ ... ربنا بصير لا نهائي صبر على يونا حتى يفهم يونا قصد الله و تفكيره

أفلا أشفق أنا على نينوى المدينة العظيمة التي يوجد فيها أكثر من اثنتي عشرة ربوة من الناس الذين لا يعرفون
يمينهم من شمالهم، وبهائم كثيرة؟

— يونا 4 : 11

طبعاً ده شعار السفر برحمة و شفقة ربنا على الكل ... تفاصيل أكثر في التأمل ده

تفسير بعض الآيات

ما لك نائماً؟ قم اصرخ إلى إلهك عسى أن يفكر الإله فينا فلا نهلك

— يونا 1 : 6

النوم الثقيل معناه غفلة تامة عن الوضع اللي حاصل ... تفاصيل أكثر في التأمل ده

الذين يراعون أباطيل كاذبة يتركون نعمتهم

— يونا 2 : 8

الأباطيل الكاذبة دي أي حاجة مش مهمة في حياة الإنسان. يتبعده عن ربنا ... تفاصيل أكثر في التأمل ده

و بلغ الأمر ملك نينوى فقام عن كرسيه و خلع رداءه عنه و تغطى بمسح و جلس على الرماد

— يونا 3 : 6

علامة التذلل زمان ... بدل اللبس العادي يلبسوا لبس متواضع جداً (مسوح) و يقعدوا على الأرض

و خرج يونا من المدينة و جلس شرقي المدينة و صنع لنفسه هناك مظلة و جلس تحتها في الظل حتى يرى ماذا يحدث
في المدينة

— يونا 4 : 5

الحقيقة الكتاب لم يذكر يونا كان بيراقب إيه في المدينة بالضبط, أو كان إيه هدفه؟ لكن الأقرب إنه كان بيشفو هل التوبة هاتستمر ولا لأ؟

المراجع الرئيسية



- موقع [The Bible Project](#)
- وعظات أبونا داود لمعي من [برنامج فتشوا الكتب](#) أو من [المكتبة الصوتية على موقع كنيسة مارمرقس](#)
- موقع [القديس تكلهيمانوت](#)